A close-up portrait of a woman with dark skin and hair, looking slightly to the right. A single tear is visible on her right cheek. The lighting is soft and focused on her face.

**Fesili e 5 e
Faatatau i
Mafatiaga**

TALI

Ala Mai!

Vol. 101, No. 2 2020 SAMOAN

Aofa'iga o Mekasini ua Saunia: 93,354,000
E Maua i GAGANA e 225

Awake! (ISSN 0005-237X)

July/August 2020 is published by
Watchtower Bible and Tract Society of
New York, Inc.; Harold L. Corkern, President;
Mark L. Questell, Secretary-Treasurer;
1000 Red Mills Road, Wallkill, NY 12589-3299.
© 2020 Watch Tower Bible and Tract
Society of Pennsylvania.
Printed in Japan.

Mo SAMOA:
Jehovah's Witnesses
PO Box 673
Apia

Mo AUSETALIA:
Jehovah's Witnesses
PO Box 280
Ingleburn, NSW 1890

Mo tuatusi uma taga'i i le
www.jw.org/sm/molimau-a-ieova.

A o faagasolo taimi, o le to'atele ua aafia i mea e tutupu e pei o ma'i, faalavelave faafuase'i, mala faalenatura po o sauāga.

Ua sa'ilia e tagata ni tali.

- O nisi e manatu o mafatiaga o ni mea ua uma ona tuupōina, po o le lagona e lē mafai ona tatou faatonutonuina mea e tutupu iā i tatou.
- O nisi e talitonu i le tulafono o le *karma*. E latou te faapea mai ua mǎfua ona mafatia, ona o a latou amio na fai a o iai i se isi olaga na ola muamua ai.

O mea e tutupu ua atili ai
ona tele fesili a tagata nai lo
o le mauaina o tali.



Pe e te mana'omia se asiasiga po
o se su'esu'ega faale-Tusi Paia?

Taga'i i le www.jw.org,

pe lafo lau talosaga i se
tuatusi o loo ta'ua iinei.

E lē faatauina lenei tusi. Ua saunia e a'oa'o'ina ai le Tusi Paia i le lalolagi aoao, ma ua lagolagoina e ala i foa'i taufofo.

Mo le faia o foa'i taufofo, taga'i i le donate.jw.org. Se'i vaganā ua faailoa atu, ae o mau uma o loo i lenei tusi ua sii mai i le faaliliuga O le Tusi Paia—O le Faaliliuga a le Lalolagi Fou.

1

Pe e tuua'ia le Atua i o tatou mafatiaga?

2

Pe e tuua'ia i tatou lava i o tatou mafatiaga?

3

Aiseā ua mafatia ai tagata lelei?

4

Pe na foafoaina i tatou ia mafatia?

5

Po o le a faai'uina ea mafatiaga?



TALITONUGA O ISI




Hinitū

E manatu tagata Hinitū o mafatiaga, o i'uga ia o gaoioiga a tagata na faia i le taimi nei, po o le olaga na i ai muamua. E mafai e se tagata ona 'alofia le toe fanau mai i se isi tino pe a oti (*moksha*), e ala i le ola i se olaga e faafitia uma ai ona lava mana'oga.

Talitonuga faa-lutaia

Ua faapea mai tagata lutaia o mafatiaga, o i'uga ia o galuega a le tagata lava ia. Ae ua faapea mai isi, o le a tauia i le toetū tagata lē sala ia na aafia i mafatiaga, pe a mavae le faamasinoga. E a'oa'o i le faa-lutaia le talitonuga o le toe ola mai i se isi ituaiga meaola (*Kabbalistic*), lea e maua ai e se tagata le avanoa e toe faasa'o ai ana mea sesē.




Musalimi

E manatu tagata Musalimi o mafatiaga, o se faasalaga mo agasala ma o se tofoto-foga fo'i o le faatuatua. Ua faapea mai Dr. Sayyid Syeed, o le peresitene o le *Islamic Society* o Amerika i Mätū: O mea e tutupu i le olaga ua avea o se faamanatu, ina "ia tumau ona lotofaafetai i le Atua mo faamanuiaga ma ia lagolago-sua i ē o loo mana'omia le fe-soasoani."



Lotu Puta

E talitonu tagata lotu Puta o mafatiaga e te maua i le tele o olaga e te ola ai, o se faataamilosaga o le toe fanau mai o se tasi pe a oti lea e faaauau se'ia oo ina faamuta ana gaoioiga leaga, faalogona ma faanaunauga leaga. E ala i a latou a'oa'oga, o galuega lelei ma le puleaina lelei o le mafaufau, o le a oo atu ai se tasi i le *nirvana* po o le tulaga ua mafai ona ia taofia mafatiaga uma.



Confucian

Ua faapea mai le *A Dictionary of Comparative Religion* e toetoe o mafatiaga uma e fesoota'i atu i "mea sesē ma le lē taulau o tagata." Ua faapea mai a latou a'oa'oga, e ui e mafai ona faaitiitia mafatiaga e ala i le ola i se olaga lelei, ae o le isi tele e māfua mai i "foafoaga agaga lea e sili atu le malolosi nai lo o tagata. Ona o lea tulaga, e ao ai i tagata ona talia e aunoa ma le faitio le talitonuga o le Tuupōina."



Talitonuga faalotu a nisi o ituaiga

E manatu nisi ituaiga, e fesoota'i atu mafatiaga i faiga faaagaga. E tusa ai ma nei talitonuga, e aumaia e tagata e faaogāina agaga leaga le manuia po o mala, ma e faatonotonuina a latou gaoioiga i tū ma aga eseese. Pe a mafatia se tasi i ma'i, o vai ma fofō a foma'i faataulāitu, e aveesea ai aafiaga o gaoioiga a agaga leaga.

Kerisiano

E manatu Kerisiano, o mafatiaga e māfua mai i le ulua'i tagata lea o loo ta'ua i le tusi o Kenese. Peita'i, o le tele o lotu ua faaopoopo i ai a latou lava talitonuga e faatatau i lea a'oa'oga.

O se faata'ita'iga, ua faapea mai nisi tagata Katoliko, o mafatiaga o le tagata o se tau-laga lea e ofo atu i le Atua ina ia manuia ai le lotu, pe e mafai fo'i ona faaolaina ai se isi.

IA A'OA'O ATILI

Maimoa i le vitiō *Pe e Talia e le Atua Tapua'iga Uma?* i le jw.org.

1

PE E TUUA'IA LE ATUA I O TATOU MAFATIAGA?

Le Māfuaaga e Tāua ai

E to'atele tagata ua latou teena le Atua ona ua latou tuua'ia o ia i o latou mafatiaga.



Ia Mafaufau i ai

O le to'atele o ta'ita'i lotu e latou te a'o-a'o'ina, a lē i se auala tuusa'o pe iloagatā e faapea, o le Atua le pogai o o tatou mafatiaga. Mo se faata'ita'iga, ua faapea mai nisi:

- O mala faalenatura o se faasalaga mai le Atua.
- Ua maliliu tamaiti ona e mana'omia e le Atua nisi agelu i le lagi.
- E faaitu'au le Atua i taimi o taua, ma o le māfuaaga lenā o le tele o mafatiaga.

Ae pe e mafai ona sesē manatu o loo a'o'a'o'ina e ta'ita'i lotu e faatatau i le Atua? Ae a pe afai ua teena e le Atua i latou?

IA A'OA'O ATILI

Maimoa i le vitiō *Aiseā e Su'esu'e ai le Tusi Paia?* i le jw.org.



Manatu o le Tusi Paia

E lē o le Atua le pogai o o tatou mafatiaga.

Pe afai o le Atua e māfua ai, e matuā eseese lava la ma ona uiga o loo ta'ua i le Tusi Paia. Mo se faata'ita'iga:

“E tonu ona [Atua] ala uma. . . . E amiotonu ma amio sa’o o ia.”—**TEUTERONOME 32:4.**

“E mamao lava i le Atua moni ona faia o se mea leaga, Ma Lē e ona le malosi uma lava ona faia o se mea e lē tonu!”
—**IOPU 34:10.**

“E lē faapi’oina fo’i e Lē e ona le malosi uma lava le faamasinoga.”—**IOPU 34:12.**

E teena e le Atua lotu o loo a’oa’oina manatu sesē e faatatau iā te ia.

E aofia ai lotu o loo a’oa’oina o le Atua le pogai o o tatou mafatiaga ma i latou o loo aafia i faigātaua ma faiga sauā.

“Ua vavalo perofeta i mea pepelo i lo’u [Atua] igoa. Ou te le’i aauina atu i latou, ou te le’i poloa’i atu iā i latou pe tautala atu fo’i iā i latou. A ua latou tautatala faavaloaga atu iā te outou i le faaliga pepelo . . . ma le faa’ole’ole o o latou loto.”
—**IEREMIA 14:14.**

Na ta’usalaina e Iesu lotu faagutugutulua.

“E lē ulu atu i le malo o le lagi i latou uma o ē fai mai iā te a’u, ‘ Le Alii e, le Alii e,’ ae e na o lē na te faia le finagalo o lo’u Tamā o i le lagi. E to’atele e fai mai iā te a’u i lea aso, ‘ Le Alii e, le Alii e, pe matou te le’i faia ea ni valoaga ma tutuli temoni, ma faia le tele o galuega mamana i lou suafa?’ Ona ou ta’utino atu lea iā i latou: Ou te le’i iloa lava outou! Inā ō ese ia iā te a’u, o outou o ē faia mea leaga.”
—**MATAIO 7:21-23.**

Pe e tuua’ia le Atua i o tatou mafatiaga?

Se’i faapea na tausia e se tamā lana fanau ma saunia mea lelei uma mo i latou. Mulimuli ane, na fouvale se tasi o atalii, tuua le aiga ma filifili e ola i se olaga leaga. Pe e tuua’ia le tamā ona o amio a le atalii? Pe e tuua’ia e le atalii lona tamā i i’uga leaga ua ia selesele i ai? I se tulaga talitutusa, e lē mafai ona tuua’ia le Atua i o tatou mafatiaga.

Po o lona uiga la o le a tuua’ia i tatou lava i o tatou mafatiaga?

Taga’i i le fesili 2.

2

PE E TUUA'IA I TATOU LAVA I O TATOU MAFATIAGA?

Le Māfuaaga e Tāua ai

Pe afai o le tali o le ioe, atonu la o loo iā i tatou le malosi e faaitiitia ai mafatiaga.



IA A'OA'O ATILI

Maimoa i le vitiō *Aiseā na Foafoaina ai e le Atua le Lalolagi?* i le jw.org.

Ia Mafaufau i ai

O le ā le tele ua tuua'ia ai tagata i le pogai o mafatiaga o loo mulimuli mai?



Faaleagaina.

I se fua faatatau a le Faalapopotoga o Soifua Mālōlōina a le Lalolagi (WHO), o le tasi o vae fā o tagata matutua e mafatia mai lava o laiti i sauāga. Ae o le tasi o vaetolu o tama'ita'i e oo i ai sauāga i le tino, le faaoolima matagā, po o le tutupu fo'i o nei mea uma iā i latou i nisi taimi i o latou olaga.



Faafitauli Tau Soifua Mālōlōina.

I se mataupu o loo lomia i le mekasini o le *National Geographic*, na tusi ai Fran Smith e silia ma le piliona tagata e ulaula, ma ua avea le tapaa o se tasi o māfuaaga autū o le oti e pei o le ma'i fatu, pē le tino, ma le kanesa o māmā.



Faavauvau.

Ua faapea mai le *World Health Statistics 2018*, lea na lomia e le WHO: "I se fua faatatau, e 477,000 i latou na fasiotia i le lalolagi atoa i le 2016." E faaopoopo atu i lenā fuainumera le 180,000 o tagata e manatu iai na fasiotia i taua ma vevesi i o latou vaipanoa, i lenā lava tausaga.



Avanoa lē Tutusa.

Ua ta'ua e Jay Watts o se foma'i o le mafaufau: "O le mativa ma le tusitusilima, ua avea ma mataupu autū o le faailoga-tagata, faailoga ituaiga, tuua o aiga ae o ese, ma aganuu faatautavā ua faatupulā'ia ai mafatiaga o le mafaufau."

Manatu o le Tusi Paia

O le tele o mafatiaga e matuā tuua'ia ai lava tagata.

O le tele o na mafatiaga e ala mai i faigāmalo sauā, lea e aumaia se olaga faigatā mo tagata.

“Ua pule ai le tagata i le isi tagata ma ua matuā afāina ai o ia.”—**FAILAUGA 8:9.**

E mafai ona faaitiitia mafatiaga.

I mataupu silisili o le Tusi Paia o loo faa-auluma ai le soifua mālōlōina lelei ma ni faia filemu ma isi.

“O le loto e to'afilemu o le ola lea o le tino o le tagata, a o le lotoleaga e pala ai ivi.”

—**FAATAOTO 14:30.**

“Ia tuu lo outou ita umi, ma le itaitagofie, ma le lotoa, ma le soona 'e'e, ma upu masoā, atoa fo'i ma mea leaga uma.”—**EFESO 4:31.**



Pe e tuua'ia i tatou lava i o tatou mafatiaga?

Ua faapea mai le Tusi Paia: “O le mea e lūlūina e le tagata, o le mea lava lea e na te seleseleina mai.” (Kalatia 6:7) O nisi mafatiaga e māfua ona o a tatou lava filifiliga. O le māfuaaga lenā e fautuaina ai e foma'i tagata ia tausami i mea'ai paleni, faamalositino, ma ia 'alofia masaniga leaga e pei o le ulaula. Peita'i, e faigofie ona faapea atu o mafatiaga **uma** e māfua ona o mea e faia e tagata, ma ua to'atele ai tagata ua aafia fua i faalavelave faafuase'i, mala faalenatura ma isi mea o loo tutupu.

Aiseā ua mafatia ai tagata lelei?

Taga'i i le fesili 3.

3

AISEĀ UA MAFATIA AI TAGATA LELEI?

Le Māfuaaga e Tāua ai

O le mea moni, o se faiga lē tonu le mafatia o tagata lelei. O nisi e manatu e la'itiiti le tāua o le aveā ma tagata lelei.



Ia Mafaufau i ai

O nisi e talitonu o le tele o mea e tutupu e māfua ona o le tuupōina. O nisi e manatu o mafatiaga ua faaaogā e le Atua e faasala ai tagata leaga, ae tofotofo ai le faatuatua o tagata lelei. Ae ua faapea mai nisi e faigatā ona malamalama atoatoa i le māfuaaga ua mafatia ai tagata lelei. Peita'i, o nei ituaiga o talitonuga ua lāgā ai fesili nei:

- Pe afai o le olaga e pulea e le tuupōina, aiseā la e taumafai ai ia soifua mālōlōina ma faia filifiliga lelei?
- Pe afai e manatu mamafa mai le Atua i tagata, aiseā la ua ia faaaogā ai mafatiaga e tofotofoina ai i latou?



IA A'OA'O ATILI

Maimoa i le vitiō *Aiseā ua Lē Taofia ai e le Atua Mafatiaga?* i le jw.org.

Manatu o le Tusi Paia

O mafatiaga e lē o se faasalaga mai i le Atua.

I se faeseesega, o le tele lava o mea e tutupu faafuase'i. E masani a ona o le iai o se tasi i se nofoaga sesē ma i le taimi sesē.

“E lē manumalo pea i le tausinioga o ē e saosaoa, pe e manumalo ē e malolosi i le taua, pe e iai fo'i i ē e atamamai mea'ai, pe e maua e ē ua malamalama le tamao- iga, pe e aloa'ia fo'i i latou ua popoto; auā e tutupu faafuase'i mea iā i latou uma i le taimi e le'i faatalitalia.”—**FAILAUGA 9:11.**

O tatou faanaunauga agasala e saosaolaumea i mafatiaga.

E masani ona faaaogā e tagata le upu “agasala” e faasino atu i gaoioiga leaga lea e faia e se tasi. Peita'i, e faaaogā fo'i i le Tusi Paia e faamatala ai le tulaga agasala ua tuufaasolo mai i tagata, e tusa po o se tagata lelei pe leaga.

“Na fanaua a'u i le amioleaga ma le tigā, Na afuafua fo'i a'u i le manava o lo'u tinā i le agasala.”—**SALAMO 51:5.**

Ua fai le agasala ma aafiaga mata'utia i tagata.

E lē gata ua faaleagaina ai la tatou faia ma Lē na foafoaina i tatou, ae ua faasea ai fo'i i tatou mai i isi ana foafoaga. Ua i'u atu ai tagata ta'ito'atasi i le tele o mafatiaga, faapea fo'i ma le lalolagi atoa.

“Pe a ou loto atu e fai le mea lelei, ae ua iā te a'u le leaga.”—**ROMA 7:21.**

“O loo ōi faatasi pea ma tigā faatasi foafoaga uma e oo mai i aso nei.”—**ROMA 8:22.**

Aiseā ua mafatia ai tagata lelei?

O le tele o o tatou mafatiaga e māfua mai i o tatou faanaunauga agasala, lea ua tuufaasolo mai i tagata lelei ma tagata leaga. O na faanaunauga agasala ua saosaolaumea i le faaleagaina o le tino ma le mafaufau, lea e faapogaia ai tagata e faia mea leaga i isi.

Po o le finagalo na o le Atua? Pe na faia i tatou ia mafatia?

Taga'i i le fesili 4.

4

PE NA FOAFOAINA I TATOU IA MAFATIA?



Le Māfuaaga e Tāua ai

O le tali o lenā fesili e aafia ai lau vaaiga i le olaga.



Ia Mafaufau i ai

Pe e talafeagai i le Atua o lē na foafoaina se lalolagi matagofie, ona tuuina mai iā i tatou se olaga e tumu i mafatiaga?

E vaai tagata e lē ō i ni lotu i mafatiaga o se avanoa e tuua'ia ai le Atua e faapea e lē o manatu mamafa mai. E latou te talitonu o mafatiaga ua faailoa mai ai e (1) leai se mana o le Atua e taofia ai, (2) lē manatu mamafa mai le Atua e taofi mafatiaga po o le (3) e leai se Atua.

Pe e na o le pau ia o māfuaaga ua mafatia ai tagata?

IA A'OA'O ATILI

Maimoa i le vitiō *E Faapefea Ona Tatou Mautinoa e Sa'o A'ia'i le Tusi Paia?* i le jw.org.

Manatu o le Tusi Paia

E le'i foafoaina e le Atua i tatou ia mafatia.

O lona finagalo ia tatou olioli i le olaga.

“E leai se mea e sili atu mo [tagata], nai lo o le olioli ma faia le mea lelei i le olaga o se tasi; i le ma lea, ia ta'itasi le tagata ma 'ai ma inu ma fiafia i mea lelei ona o ana galuega mamafa uma. O le meaalofa lea mai i le Atua.”—**FAILAUGA 3:12, 13.**

Na avatu e le Atua i ulua'i tagata se olaga e lelei atoatoa.

E na te le'i foafoaina i la'ua po o ē na tupuga mai iā i la'ua ia mafatia.

“Ua fetalai atu le Atua iā i la'ua: 'Ia fanafanau ma ia matuā faato'ateleina, ia tumu ai le lalolagi ma ia galuea'iina.'”
—**KENESE 1:28.**

Na filifili le ulua'i tagata e lē usiusita'i i le Atua.

O le i'uga, ua la aumaia ai le tele o mafatiaga iā i la'ua ma i latou uma na tupuga mai ai.

“E pei ona oo mai o le agasala i le lalolagi ona o le tagata e to'atasi, o le oti fo'i ona o le agasala, ona oo mai ai lea o le oti i tagata uma auā ua agasala uma lava.”
—**ROMA 5:12.***

* I le Tusi Paia, o le upu “agasala” e lē gata e faasino atu i **gaoioiga** sesē, ae e uiga atu fo'i i se **tulaga** ua tuufaasolo mai i tagata uma.

E le'i foafoaina e le Atua i tatou ia ola tuto'atasi e aunoa ma lana ta'ita'iga.

E pei ona lē mafai ona ola o le tagata i totonu o le vai, e faapena fo'i ona lē mafai ona pulea e tagata i latou lava.

“E lē o i le tagata fo'i e savali, ona faatonuina le mea e ui ai o ia.”—**IEREMIA 10:23.**

E le'i finagalo le Atua ia tatou mafatia.

O lona finagalo ia tatou 'alofia faafitauli i le tele e mafai ai.

“E lelei pe a e faalogo mai i a'u poloa'iga! Ona pei ai lea o se vaitafe lou filemu.”
—**ISAIA 48:18.**

Pe na foafoaina i tatou ia mafatia?

E leai. O mafatiaga, e lē o se vaega o le finagalo o le Atua mo tagata. Na amata mai mafatiaga ina ua filifili le ulua'i tagata e lē usiusita'i i le Atua. Peita'i, e lē uiga atu ai o le a mafatia tagata e oo i le faavavau.

Po o le a faai'uina ea mafatiaga?

Taga'i i le fesili 5.

5

PO O LE A FAAI'UINA EA MAFATIAGA?

Le Māfuaaga e Tāua ai

Pe afai e iai se māfuaaga e talitonu ai o le a faai'uina mafatiaga, o lenā faamoemoe o le a faaleleia ai la tatou vaaiga i le olaga ma e faapena fo'i i le Atua.



IA A'OA'O ATILI

Maimoa i le vitiō *O le ā le Malo o le Atua?* i le jw.org.

Ia Mafaufau i ai

O le to'atele o tagata e manana'o ia aveesea mafatiaga, ae e gata mai lo latou iloa e faia ai faapea. Mātau manatu o loo mulimuli mai:

E ui i le aga'iga'i i luma o le tomai faafoma'i ae . . .

- Ua avea le gasegase o le fatu ma māfuaaga autū o le oti.
- I tausaga ta'itasi e faitau miliona i latou ua maliliu ona o le kanesa.
- I le tusi *Frontiers in Immunology* na tusi ai Dr David Bloom e faapea: "O loo faaaauu ona lē maua e le lalolagi se vaifofō i le faamata'u mai o faama'i ua leva ona iai ma faama'i fou."

E ui i le aga'iga'i i luma o le tamaoaiga i nisi atunuu ae . . .

- E faitau miliona tamaiti e maliliu i tausaga ta'itasi ma o le to'atele e nonofo i vaipanoa e matitiva.
- E 4.5 piona tagata o loo ola e aunoa ma ni nofoaga mamā.
- E faitau selau miliona i latou e lē o maua ni vai mamā.

E ui i le faatupula'ia o le amana'iaina o aiā tatau a tagata ae . . .

- Na ta'ua i le lipoti a le *United Nation*: O loo faaaauu i le tele o atunuu le faatau atu faasolitulafono o tagata. E lē o faia e le malo ni moliaga iā i latou na, ona atonu o le "lē iloa o le faafitauli, po o le leai fo'i o se tomai e fesaga'ia ai."



Manatu o le Tusi Paia

O loo manatu mamafa mai le Atua iā i tatou.

E silafia e ia o tatou tigā ma faanoanoaga.

“E lē inosia e ia [Atua] e lē ‘ino’ino fo’i i le tigā o lē ua puapuagatia; e na te lē natia ona fofoga mai iā te ia, ma e faafofoga mai fo’i o ia pe a ia tagi atu iā te ia mo se fesoa-soani.”—**SALAMO 22:24.**

“Ia ta’u atu o outou popolega uma iā te ia, auā o loo manatu mamafa mai o ia iā te outou.”—**1 PETERU 5:7.**

E lē faaauau ai pea ona tatou mafatia.

Ua folafola mai i le Tusi Paia o le a faa-taunuu le fuafuaga a le Atua mo i tatou.

“E na te [Atua] soloiesea fo’i loimata uma i o latou mata, e lē toe iai se oti, po o se faanoanoa, po o se tagiaue, e lē toe iai fo’i se tigā.”—**FAAALIGA 21:3, 4.**

O le a aveesea e le Atua le pogai o mafatiaga o tagata.

O le a ia faia faapea e ala i lona Malo lea o loo ta’ua i le Tusi Paia o se faigāmalo moni.

“O le a faatūina ai e le Atua o le lagi o le malo e lē faaumatia lava. O lea malo fo’i e lē tuuina atu i se isi nuu. . . . E tumau lea malo e faavavau.”—**TANIELU 2:44.**

Po o le a Faai’uina ea Mafatiaga?

loe, ae e lē mafai e taumafaiga a tagata. E na o le aveesea e malo faaletagata o āuga o o tatou mafatiaga, ae e mafai e le Atua ona aveesea le pogai o mafatiaga, e ala mai lona Malo.



E MAUA LE FESOASOANI

Po ua maliu sē e pele iā te oe?

- Taga'i i le jw.org, ma ta i totonu o le pusa o loo iai le upu su'e le "fesoasoani mo ē e faavauvau."

Po o e feagai ma ni faafitauli tau tamaoaiga?

- Taga'i i le jw.org, ma ta i totonu o le pusa o loo iai le upu su'e le "faasoalelei au tupe."

Pe na e tuufesili, 'O le ā ea le aogā e ola ai?'

- Taga'i i le jw.org, ma ta i totonu o le pusa o loo iai le upu su'e le "o le ā ea le aogā e ola ai?" ma le "pe e tāua le ola pea?"

Po o e feagai ma se ma'i faaumiumi?

- Taga'i i le jw.org, ma ta i totonu o le pusa o loo iai le upu su'e le "auala e feagai ai aiga ma ma'i faaumiumi."

O loo iai i le Tusi Paia le ta'ita'iga e sili ona lelei mo le olaga mo sui ta'itasi o le aiga. O loo iai mataupu silisili e mafai ona faaleleia ai le tomai e mafaufau lelei ai ma faia ai faai'uga lelei.

—FAATAOTO 1:1-4.

Matou te valaaulia oe e iloilo e oe lava le Tusi Paia. Maimoa i le vitiō *Aiseā e Su'esu'e ai le Tusi Paia?* Faaogā le code pe taga'i i le jw.org.



E maua leni mekasini ma isi lomiga i le Initaneti e aunoa ma se totogi



Ua maua le Tusi Paia i le Initaneti i le faitau selau o gagana

Faaogā le code pe taga'i i le jw.org



920.2-SM
200203